



Photo: Keystone

Uschespert che las migrantas ed ils migrants conuschian (vaira) bain il linguatg pon sustegnair ils meds da massa svizzers, surtut la televisiun e gasettas quotidianas, il process d'integraziun personal. Quai mussan dus studis actuals.

## Tema central integraziun

La SRG SSR tematisescha l'integraziun	3
Infurmar, betg moralisar	4
Integraziun cun guardar televisiun?	6
Differenzià empè dad unilateral	8

## L'integraziun ha conjuntura auta

Gievgia, ils 10 d'avrigl 2008, en l'emissiun «Kontext» sin DRS2 a las 9.05: Christoph B. Keller reflectescha en ina contribuziun davart l'integraziun: «Tuts discurren d'integraziun – ils politichers, las lavureras socialas, ils incumbensads da furmazion. A tgi pens'ins dentant sch'ins dovra l'imperativ «integraziun» – vairamain «als» esters ubain mo a tscherts ester, numnadamain a quels da las uschenumnadas classas senza scolaziun? I n'è insumma betg cler, co che l'integraziun duai s'accordar cun la pluralisaziun dals stils da viver ch'ins vesa dapertut». E questa introducziun ans mussa già l'entira dimensiun, la vitalità e la gronda brisanza da la tematica. L'integraziun ha conjuntura auta. La mobilitad dal 20avel tschientaner ha relativà pli e pli ils cunfins naziunals e promovì migraziuns. Guerras, catastrofes e crisas economicas han sforzà umans da bandunar lur patria e da far a l'ester novas ragischs. Anc avant 30 onns discurrevan nus d'ina coesistenza da pliras culturas, d'assimilaziun e d'acculturaziun. Avant 20 onns discurreva mintgin da la «multiculturalità» sco convivenza ideala da glied da differenta provegnientscha e religiun. Oz essan nus en in'otra situaziun. Dapi il settember 2005, dapi la debatta en Germania davart ina cultura directiva tudestga, dapi ils incendis a l'ur da Paris, dapi l'assassinat da Theo van Gogh 2004 en Olanda e la debatta davart Ayaan Hirsi Ali, dapi la pretensiun dal primminister tirc Erdogan d'endrizzar en Germania scolas spiramain tircas, dapi l'iniziativa davart ils minarets en Svizra e la mort violenta d'in giuven Svizzer el Tessin è la situaziun in'otra.

### L'incumbensa centrala da la politica e la societad

Il discurs politic davart l'integraziun dad estras ed esters – u da migrantas e migrants, da personas immigradas ed abitants cun ina derivanza da migra-

ziun, per duvrar la terminologia correcta – quel discurs è stà onns a la lunga il tema preferì da la politica sanestra, da las baselgias e da las ovas charitativas. Savens vegniva discutà cul bel intent da vesair ed acceptar l'ester sco auter agen. Quai n'ha dentant betg gidà a schliar ils problems en scola, a la lavur, en la publicità.

Oz debattesch'ins pli aspramain davart l'integraziun, savens er cun plets stereotipics, polemics e violents. Insatge han'ins dentant cuntanschi: l'integraziun è oz ina da las incumbensas centralas da la politica e da la societad. Las partidas politicas han preni posiziun; il cussegl federal ha relaschà in rapport extendì davart mesiras d'integraziun, sin nivel chantunal e communal lavuran incumbensads d'integraziun e la cumissiun d'esters federala dat regularmain in premi per projects d'integraziun bainreussids. Las baselgias e las ovas d'agid han creà instituziuns che dattan als immigrads sustegn ed agid per dumagnar il mintgadi.

### Tge è l'integraziun

Ina definiziun generala na pon ins betg dar. Perquai prend jau in maletg che Walter Schmid, l'anterier vicepresidente da la cumissiun d'esters

federala, dovra sco metafra per l'integraziun: in flum cun in ual affluent. I dat in flum principal ed en quel cula l'aua din ual lateral. Quella aua è differenta da quella dal flum principal, l'ha in'au-tra colur, in'au-tra sveltezza, in'au-tra derivanza. Là, nua che las duas auas s'uneschon, ves'ins la differenza e là buglia l'aua, là datti irritaziuns. Tgi ch'ha nudà ina giada en ina tala aua sa, ch'i n'è betg uschè simpel, ch'i po perfin far in pau tema. Però: précis là sa maschaidan las auas, las irrita-

ziuns, la preoccupaziun è necessarias. Insacura è l'aua lura puspè quieta, il flum calm – i dat in nov flum principal, in nov «mainstream».

**La SRG SSR idée suisse e l'integraziun**


La purschida da program durant l'emna tematica da la SRG SSR dals 7 als 13 d'avrigl 2008 vul curvir quel maletg: nus tematisain il flum principal, l'ual affluent, il lieu, nua ch'els s'uneschon e quel, nua ch'i dat irritaziuns. La cultura da migrants è oz ina realitad. Quella realitad vulain nus mussar en noss programs da radio e televisiun. Il mussa-via da nossa grupp da project èn ponderaziuns dal professor Bassam Tibi che docescha davart relaziuns internaziunalas a la Cornell University USA ed a l'universitad da Göttingen. El constata il suandant:

- la diversitad culturala po esser tant ina funtauna da ritgezza sco ina da conflict
- ina charitad ordinada en il senn d'in multiculturalissem betg reflectà che pregia ina casualitad da valurs e romantischescha culturas estras ston'ins metter en dumonda.
- l'alternativa als dus extrems pudess esser in pluralissem da culturas che collia la diversitad cun in consens da valurs.


L'acceptanza dal tema da la SRG SSR e la resonanza a l'emna tematica «Wir anderen – nous autres – noi altri – nus auters» vegn a mussar sche l'integraziun da migrantas e migrants en noss pajais è in cas da precedenza per la societad u mo in fenomen dal temp

Mariano Tschuur  
manader da project naziunal da l'emna d'integraziun SRG SSR

**La populaziun svizra tenor naziunalitad**



**Esters da l'Europa en Svizra**



La gronda part dals 1,5 milliuns migrantas e migrants deriva da l'Europa, surtut da l'Italia, da la Germania, da la Serbia/Montenegro u dal Portugal.

Funtauna: uffizi federal per statistica (ESPOP, PETRA) 2006

## La SRG SSR idée suisse tematisescha l'integraziun

Tgeninas èn las vistas d'ina societad multiculturala? Cun tge problems vegn la Svizra confruntada, in pajais cun ina da las pli grondas parts d'esters en Europa? Co vivan ils umans cun ragischs estras en Svizra e tge experientschas fa la populaziun indigena cun els? Dals 7 als 13 d'avrigl 2008 va il tema integraziun da migrantas e migrants sco in fil cotschen tras ils programs da radio e televisiun e la porschida online da la SRG SSR idée suisse.

L'emna tematica che sa nomna «Wir anderen – nous autres – noi altri – nus auters» è l'emprima offerta da programs da la SRG SSR coordinada naziunalmain. Tut ils emetturs da radio e televisiun da la Svizra tudestga, franzosa, taliana e rumantscha fan part: tant cun emissiuns d'infurmaziun e da documentaziun sco cun films dramatics ed emissiuns da divertiment. En pli porschan tut ils programs ed er Swissinfo dossiers e forums da discussiun sin lur paginas d'internet. Las survistas da program actualas mussan, tge ch'ins auda e vesa nua. Tgi ch'ha manchentà ina emissiun la po tadlar pli tard online.

Las moderaturas da radio ed ils redactors da televisiun fan en lur emissiuns dumondas las pli differentas: Co vesa in Brazilian nus Svizras? Tge è per las migrantas ed ils migrants «tipic svizzer»? Tge raquinta ina Russa da ses mintgadi en Svizra? Co viva la glied da l'anteriura Jugoslavia, ils uschenomnads «Jugos», ch'han la reputaziun d'esser ils pli criminals dals immigrads? Pertge na lavura ina media tirca betg en la professiun ch'ella ha

emprenni en sia patria, mabain sco nettegiunza? Tge cundiziuns ston ins ademplir per vegnir naturalisà en Svizra? Vul naturalisà er dir integrà? Èn migrants automaticamain da chasa en Svizra sch'els èn ritgs ed han success? Quant svizra è la musica populara svizra? Datti ina musica da segundos? Tge rolla giogan ils usits e las tradiziuns tar l'integraziun? Co s'accordan in pudding d'ovs tamil e la merenga da l'Emmental?

### En detagl

Sin [www.srgssrideesuisse.ch](http://www.srgssrideesuisse.ch) «En il focus/emna tematica davart l'integraziun» chatt'ins tut las infurmaziuns davart l'emna tematica da la SRG SSR.

## In emissiun da «Doc» premiada

Ina da las emissiuns che vegnan emessas durant l'emna tematica ha gudagnà 2007 il premi da medias CIVIS per integraziun e diversidad culturala: «Neue Heimat Lindenstrasse», ina emissiun da «Doc», producida dad SF.

La Lindenstrasse a Reussbühl, a l'ur da la citad da Lucerna, ha in nausch num. Ella vegn clomada il «ghetto». Quasi nagliur en Svizra na vivan dapli esters ensemen. La via ha ina lunghezza da be 200 meters e tuttina cuntegna ella in entir mund: en la Lindenstrasse viva glied da 22 nazions. Qua ha lieu il drama en miniatura: esters tschertgan in nov territori, ils davos indigens defendan lur identitad. Il film documentescha la vita pulsanta, ils plaschairs e fastidis da quella luentera da las nazions. La giuria da CIVIS ha motivà, pertge ch'ella ha undrà quest film cun il premi da televisiun 2007: Il film pledeschia per ina societad integrativa, nua ch'igl è pussaivel per umans da derivanza tut diversa da viver ensemen en pasch.



Funtaina: SF

Ina preschentaziun impressiunanta – excellenta en furma e cuntegn.

Il premi da medias CIVIS vegn surdà dapi 20 onns per ovras da radio e televisiun che tematiseschan l'integraziun e la diversidad culturala. Purtà vegn il premi dals radios dal dretg public da la Germania, da l'ORF austriac, dal radio sloven e da la SRG SSR idée suisse. ([www.civis.ch](http://www.civis.ch)). SF1: ils 7 d'avrigl 2008 a las 22.50.

En la Lindenstrasse a Lucerna abita glied da 22 nazions. Il film da «Doc» dad SF mussa plaschairs e fastidis da las abitantas e dals abitants.

## Nus vulain infurmar, betg moralisar

L'iniziativa da la SRG SSR idée suisse è in project temerari: ella dat al tema integraziun da migrantas e migrants dals 7 als 13 d'avrigl 2008 ina plattafurma naziunala. En las emissiuns d'infurmaziun e da divertiment da radio e televisiun ed online – en tut ils quatter linguatgs naziunals. Ni la brisanza ni impediments che duain u duain betg vegnir sviads na mancan. Il manader da project Mariano Tschuor rapporta davart ils motivs da l'emna tematica coordinada naziunalmain.

Il tema integraziun n'è betg nov en il mintgadi schurnalistic da la SRG SSR. Ina eglia da en la statistica da program da TSR, RSR, SF, SR DRS, TSI, RSI, RTR e swissinfo mussa che l'uschenum-nà «mintgadi multicultural» en Svizra è già adina stà il cuntegn da pliras emissiuns, pensain mo a l'emissiun legendara «Un'ora per voi» ubain al 1964. Quella giada ha installà il cussegl federal ina cumissiun d'experts per studegiar la problematica dals esters. Quella è vegnida a la conclusiun che la Svizra saja en privel da vegnir surimmigrada. Resultada è l'iniziativa da Schwarzenbach dal 1970. Patratgain a l'arrivada da tamils la mesadad dal onns 80. Els èn vegnids refusads vastamain. Las autoritads han furmà l'onn 1986 in gremi da fugitivs extraordinari che sa deditgava a l'onda da fugitivs tamils nunspetgada. Dapertut eran pregiudizis e xenofobia. Ins pudess cuntinuar cun

exempels fin als conflicts dal balcan ils onns 80 e las guerras en Jugoslavia ils onns 90.

### L'importanza dal tema è creschida


Nov è il conturn socialpolitic, nov il dumber da migrantas e migrants en Svizra (21,5% da l'entira populaziun), nova la frequenza da situaziuns da conflict ch'ins po deducir d'ina chapientscha differenta da dretg ed urden. Nova è dentant er l'intoleranza latentia creschenta enviers personas d'in'otra derivanza culturala, sociala e religiusa. Novs èn plinavant ils cunfin averts en Europa. Walter Rüegg, il directur da SR DRS resumescha: «La sensibilitad dals Svizzers e l'importanza dal tema en noss mintgadi crescha, e quai dapi in temp. Las medias s'occupan bain da la dimensiun da disgrazias e delicts, la basa e las difficultads da process d'integraziun betg speculars sclereschan ellas dentant darar e pauc systematicamain».

### Ina contribuziun a la percepciun differenziada

Las medias pon influenzar il process d'integraziun. Ellas furman ils purtrets che nus ans faschain dals esters: ellas pon differenziar ubain consolidar ils pregiudizis. Las medias pon collavurar decisivamain tar la percepciun publica da quest tema. Ellas pon chattar e preschentar «eroes dal mintgadi» er tar ils umans cun ina derivanza da migraziun. En quel regard po e sto gist la SRG SSR cun sia incumbenza da servetsch public far dapli. L'emna tematica da la SRG SSR «Wir anderen – nous autres – noi altri – nus auters» è resultada d'in process intensiv, dal qual blers collavuratur da la SRG SSR han fatg part: il directur general Armin Walpen, la direzziun cun ses directurs da radio e televisiun regionals ed ils producents da program da tut las regions linguisticas:

- iniziada 2006 a las dietas da «diversity» ad Essen e Cologna, organisadas da la European Broadcasting Union (EBU/UER), dal radio da la Germania dal vest e da France Télévisions;
- approfondida a las dietas internas «Ateliers de Montreux» 2006 e 2007;
- formulada en il rapport intern «Integration und Multikulturalität – Was macht die SRG SSR idée suisse?»;
- reflectada e furmada en pliras sesidas d'ina gruppa da lavur naziunala da la SRG SSR;

### Ils linguatgs principals da las migrantas e dals migrants en Svizra



Quasi dus terzs da las migrantas e dals migrants discurren tudestg, franzos u talian sco linguatg principal.

Funtauna: Uffizi federal per statistica



Photos: Keystone

Mintga tschintgavla persuna en Svizra ha in passaport ester. Il tema integraziun vegn pli e pli impurtant. Cun sia emna tematica vul la SRG SSR contribuir ad ina percepziun e discussiun pli differenziada dal tema.

- programmada e concretisada en las redacziuns dals radios e las televisiun ed online da la SRG SSR.

#### **Infurmativ, interessant, divertent**

Tge purschain nus a noss public? Ina occurrenza da la bell'aura ch'excluda la situaziun effectiva, sco ch'in aspectatur ha scrit suenter nossas conferenzas da pressa a Turitg, Losanna, Cuir e Lugano, nua che nus avain preschentà l'emna tematica? U essan nus memia da buna veglia, memia naivs, sco ch'in auter ha scrit: El sa dumondia, co che nus veglian promover l'integraziun cun questa emissiun. Sche nus crajan che nus as drizzian cun tut als esters en Svizra stoppi el dumandar ils responsabels, nua ch'els pendian? Sche nus crajan vairamain che las bleras milli antennas-cuppa sajan vegnidas montadas per recepir la SSR? El pretendia che 99% dals esters na conuschan betg la SSR. U pondereschia la SSR d'integrar a nus Svizzers?

La resposta è la purschida da program da l'emna tematica. Tgi che sa prenda la fadia da s'infurmar davart la purschida en il sector d'online, al radio e la televisiun e legia, taidla u guarda singulas parts vegn bainbaud a remartgar, quant vasta, differenziada, interessanta e divertenta ch'è quella emna. La SRG SSR n'è betg ina instituziun morala, ella ha ina incumbensa publicistica. Quella ademplescha ella di per di, durant l'emna dals 7 als 13 d'avrigl en moda concentrada e coordinada davart «nus ed ils auters - ubain: wir anderen – nous autres – noi altri – nus auters».

## Integraziun cun guardar televisiun?

La gronda part dals esters e las estras en Svizra guarda tant programs da televisiun da la patria sco da la Svizra. Bliers fan part dal public dad SF, TSR u TSI, els guardan surtut las emissiuns d'infurmaziun. Cun quai è la televisiun fitg impurtanta per intermediar infurmaziuns sur dals eveniments politics, socials, economics e culturals en Svizra. A quella conclusiun vegn il studi actual davart l'integraziun cun guardar televisiun.

En Svizra na datti praticamain naginas datas, co che la populaziun estra guarda televisiun. Igl existan er strusch retschertgas davart la dumonda da l'effect da la televisiun cun integrar esters. Perquai han fatg far la televisiun svizra (SF), l'uffizi federal da comunicaziun (BAKOM) e la cumissiun d'esters federala (EKA) in studi che persequitescha quellas dumondas. Il studi davart l'integra-

ziun cun guardar televisiun è vegnì fatg 2007 ed examinescha, co che estras ed esters che vivan en Svizra tudestga dovran la televisiun. 123 persunas da l'Italia, dal Portugal e dal Cosovo han fatg part da discussiuns en gruppa ed han emplenì questuinaris. Ils resultats dal studi n'èn betg represchentativs, han dentant parallelas cun examinaziuns sumegliantas, represchentativas da la Germania.



Photo: Keystone

Il pli savens guardan migrants e migrants programs da televisiun da lur patria. Quels pussibilliteschan da mantegnair ina relaziun stretga cun la patria, sia cultura e ses linguatg. Il consum da televisiun paterna na sto dentant betg esser il segn d'ina integraziun mancanta, constata il studi davart l'integraziun cun guardar televisiun.

### En detagl

- Il rapport davart l'integraziun cun guardar televisiun da l'institut da perscrutaziun independent INFRAS chatt'ins sin [www.srgssrideesuisse.ch](http://www.srgssrideesuisse.ch): En il focus/emna tematica davart l'integraziun.
- Il rapport «Integration und Medien» da la cumissiun d'esters federala stat a disposiziun sin [www.srgssrideesuisse.ch](http://www.srgssrideesuisse.ch): En il focus/emna tematica davart l'integraziun.

### La televisiun sco funtauna d'infurmaziun

Las estras ed ils ester dumandads sa distinguan primarmain en in punct dal public da televisiun svizzer: els èn providids meglier cun televisiun via cabel e satellit. Il pli savens guardan els programs da lur patria. Quels pussibilliteschan da mantegnair ina relaziun stretga cun l'atgna patria, cultura e lingua: els creeschon indentidad. Il consum da televisiun paterna na stoppia betg esser il segn d'ina integraziun mancanta, punctuescha il studi. La gronda part dals esters dumandads guarda er savens ils programs da televisiun svizzers. Quests uschenumnads consumers maschadads guardan il pli gugent emissiuns da sport e da divertiment sin lur chanal patern, emissiuns da novitads e d'infurmaziun guardan els tant là sco er a la televisiun svizra. Tgi che sa tudestg guarda SF, tgi che discurra talian u franzos guarda TSI u TSR. La televisiun da la Svizra tudestga (SF ed emetturs regionalis) cuntanscha stgars 60 pertschient dals esters dumandads. Sch'ins resguarda er TSI e TSR, lura cuntanschan ils programs da televisiun svizzers bunamain 80 pertschient. Il studi concluda perquai che la televisiun svizra haja ina gronda impurtanza per l'integraziun «cun intermediar infurmaziuns davart eveniments politics, socials, economics e culturals en Svizra».

### La televisiun sco mussadra da linguatg

La televisiun da la Svizra tudestga cuntanscha mo estras ed esters che san per part tudestg, ch'èn pia già integrads tendenzialmain. Ella contribuescha dentant er a la scolaziun da linguatg; quai conferman cunzunt ils dumandads pli giuvs che vivan en Svizra tudestga. La situaziun extraordinaria da la Svizra cun ses programs da televisiun nazionals en trais linguatgs pussibillitescha er a la gliud che na sa betg tudestg da s'infurmar sur da la Svizra, mess il cas ch'ella enclegia franzos u



En curs da lingua, dentant er cun tadlar e guardar programs da radio e televisiun svizzers emprendan las migrantas ed ils migrants il linguatg da lur nova patria.

Photo: Keystone

talian. Pli bain che las personas dumandadas san in dals trais linguatgs numnads, pli ch'ellas guardan SF, TSR u TSI. Quai saja d'ina vart salidaivel dal punct da vista da la politica d'integraziun, da l'autra saja la pressiu d'emprender la lingua dal domicil pli pitschna, quai che possia er esser negativ per l'integraziun, relativescha il studi.

### La piazza da lavur ed il mintgadi èn pli impurtants

L'evaluaziun da las discussiuns en gruppa e dals questiuaris mussa che la televisiun è il med da massa il pli impurtant per las migrantas ed ils migrants, ch'i dat dentant instituziuns pli relevantas per s'infurmar en il mintgadi e per emprender ad enconuscher la cultura svizra: per ils dumandads èn surtut l'ambient a la piazza da lavur ed il sistem da furmaziun instanzas d'integraziun impurtantas, tenor il rapport davart l'integraziun cun guardar televisiun.

La cumissiun federala d'esters vegn ad ina conclusiun analoga en ses rapport davart l'integra-

ziun e las medias da 2007: «Las medias n'èn betg l'instanza d'integraziun la pli impurtanta per las migrantas ed ils migrants. Discurrer cun amis e collegas al lieu da lavur e cun vischins è pli impurtant. Apaina ch'ils immigrads san discurrer tant enavant il linguatg local, pon las medias svizras, surtut la televisiun e gasettas quotidianas dentant sustegnair il process d'integraziun persunal».

## Differenzià empè dad unilateral

Che mo «bad news» èn vairamain bunas novitads en il mintgadi da las medias declera be per part las bleras novitads negativas davart immigrads. Er modas da rapportar giogan ina rolla, punctuescha la cumissiun d'esters federala en il rapport d'integraziun. Perquai tematisescha la SRG SSR sin plirs nivels, co ch'ins duess tractar migrantas e migrants: en las directivas publicisticas, cun scolar e perfecziunar schurnalistas e redactors ed en la politica da personal.

**wir anderen  
nous autres  
nus auters  
noi altri**



### Impressum

#### Editura

SRG SSR idée suisse  
Communicaziun  
d'interpresa, 3000 Berna 15  
info@srgssrideesuisse.ch

Redacziun Katrin Hemmer,  
Mariano Tschuor  
Translaziun Ladina Parli  
Design [www.publicis.ch](http://www.publicis.ch)  
Producziun,  
layout e grafica  
[www.lms-media.ch](http://www.lms-media.ch)

Stampa  
[www.sondereggerdruck.ch](http://www.sondereggerdruck.ch)

Data da publicaziun  
5 avrigl 2008

Update cumpara er en moda  
electronica en tut ils quatter  
linguatgs nazionals. La  
versiun electronica pon ins  
abunar sin la pagina [www.srgssrideesuisse.ch](http://www.srgssrideesuisse.ch) sur il ser-  
vetsch da mail ubain chargiar  
da la rubrica documents sco  
pdf sin l'agen computer.

Schebain ch'ins legia, auda e vesa adina puspè bunas reportaschas davart projects d'integraziun e buns purtrets da migrantas ch'han success, critigan ils pertutgads regularmain che las medias als descrivian cunzunt negativ. Er en las discussiuns en gruppa ch'èn vegnidas fatgas per il studi davart l'integraziun cun guardar televisiun èn s'expressas las migrantas ed ils migrants en quel senn. Els disturba surtut che tut ils esters vegnan bittads en la medema chazzetta. La gronda part giavischa ch'i vegnia rapportà pli differenziadamain. Sper las bleras infurmaziuns negativas duess er vegnir mussada ina giada l'impurtanza da las migrantas e dals migrants per la Svizra, a l'avis dals dumandads. En pli duain vegnir mussads dapli buns exempels d'integraziun.

Ils resentiments subjectivs dals dumandads vegnan confermads d'ina analisa universal: dapi la mesadad dals onns otganta è la criminalità il tema numnà il pli savens en novitads davart migrantas e migrants, scriva la cumissiun d'esters federala en ses rapport davart l'integraziun e las medias. Er Heinz Bonfadelli, professer per ciencias publicisticas a Turitg, che s'occupa già daditg dal tema medias e migraziun constata che minoritads etnicas vegnian giuditgadas savens cun stereotips e tendenzialmain en moda negativa. Il princip fatal che mo «bad news» sajan vairamain bunas novitads declera be per part las bleras novitads negativas davart immigrants, punctuescha

la cumissiun d'esters, er modas da rapportar giogan ina rolla che na saja dentant betg conscienta a blers producents da medias, di el.

#### La SRG SSR vul cuntinuar a promover l'integraziun

Ils radios e las televisiuns da la SRG SSR realiseschan il tema da las relaziuns cun migrantas e migrants già oz sin plirs nivels: cun directivas publicisticas che garanteschin ina avischinaziun averta e critica e gidan ad evitar stereotips currents e pregiudizis, cun mesiras sistematicas en scolaziun e perfecziunament, cun mussar pli savens migrantas e migrants a la televisiun, cun emissiuns multifaras davart il tema en tut ils secturs da program ed en las pli differentas furmas schurnalisticas. La SRG SSR vegn a cuntinuar ses engaschi per promover l'integraziun er suenter l'emna tematica ed a metter cun quai ils onns che vegnan ulteriurs accents. I sa tracta da midar il paradigma cun far program, en las estructuras da redacziun e program – e finalmain en il pensar e percepir da la societad.